

宋史新編

宋史新編卷一百四十一

列傳八十三

明南京戶部主事莆田柯維騏著

陳康伯

陳俊卿

子必

虞允文

梁克家

葉顥

陳康伯字長卿弋陽人宣和三年中上舍丙科歷官提
舉江東常平茶鹽紹興中累遷戶部司勳郎中康伯與
秦檜太學有舊檜當國康伯在郎省泊然無求凡五年
始遷軍器監借吏部尚書使金至汴將脯不供餉閉戶
臥館人夜扣戶謝不敏亦不對後金使至詔康伯館伴
端午賜扇帕與論拜受禮言者以生事論罷知泉州秩
一

滿奉祠垂十年檜死起知漢州將出峽召對除吏部侍郎至尚書拜參知政事未幾拜尚書右僕射同中書門下平章事上嘗謂其靜重明敏一語不妄發直宰相也又命與湯思退輔政事勿憚商論惟其當而已康伯言大至事當盡公若依阿植黨此鄙夫患失者臣非惟不敢亦素不能上嘆其長者明年拜左僕射金遣使賀天申節出嫚言求淮漢地指取將相大臣先是葉義問賀允中使還言金必敗盟康伯請早爲之備建四策至是召三衙帥及楊存中至都堂議舉兵又請侍從臺諫集議康伯傳上旨曰今日更不問和與守直問戰當如何

時內侍省都知張去爲陰沮用兵且陳退避策中外妄傳幸閩蜀人情洶洶右相朱倬無一語同知樞密院事周麟之受命聘金憚不欲行康伯獨以爲已任奏曰金敵敗盟天人共憤今日之事有進無退聖意堅決則將士之意自倍願分三衙禁旅助襄漢待其先發應之康伯勉周麟之以國事麟之語侵康伯康伯曰使某不爲宰相當自行大臣與國存亡雖死安避麟之竟以辭行貶金犯廬州王權敗歸中外震駭康伯入奏曰聞有勸陛下幸蜀趨閩者審爾大事去矣盍靜以待之一日忽降手詔如敵未退散百官康伯焚之而後奏曰百官散

主勢孤矣上意旣堅請下詔親征以葉義問督江淮軍
虞允文參謀軍事尋敗敵於采石金主亮爲其臣下所
斃而還於是報書始用敵國禮高宗倦勤康伯密贊大
議乞先正名俾天下咸知聖意遂草立太子詔以進孝
宗卽位命兼樞密使進封信國公禮遇殊渥呼丞相而
不名自建康扈從回卽以病祈去不允隆興元年請益
堅遂以太保觀文殿大學士福國公封信州已又勾外
祠除醴泉觀使二年起判紹興府且令赴闕奏事復辭
未幾召陪郊祀時北兵再犯淮甸人情驚駭皆望康伯
復相上出手札遣使卽家居召之未出里門拜尚書左

僕射同中書平章事兼樞密使進封魯國公輿疾就道
間邊遽兼程以進至闕減拜賜坐許肩輿至殿門仍給
扶掖師退尋以目疾免朝謁乾道元年卒年六十九贈
太師謚文恭後配享孝宗廟庭改謚文正康伯以經濟
自任臨事明斷孝宗嘗對輔臣稱其器量從容不迫可
比晉謝安云

陳俊卿字應求興化人登紹興進上第授泉州觀察推
官服勤職業同僚宴集恒謝不往秩滿秦檜察其不附
已抑之檜死乃以校書郎召除著作佐郎兼王府教授
累遷殿中侍御史首言人主以兼聽爲美必本至公人

臣以不欺爲忠必達大體御下之道恩威並施抑驕將
作士氣則紀綱正而號令行矣湯思退專政俊卿言冬
日無雲而雷宰相上不當天心下不厭人望詔罷思退
時災異數見金人侵軼之勢已形俊卿乃上疏爲張浚
辨讒未報因請對力言之上始悟數月以浚守建康又
言內侍張去爲陰沮用兵且陳避敵計搖成筭請按軍
法上曰卿可謂仁者之勇除權兵部侍郎金主亮渡淮
俊卿受詔整浙西水軍李寶因之遂有膠西之捷亮死
詔俊卿治淮東堡砦屯田所過安輯流亡金主裒新立
由舊好廷臣多附和議俊卿奏宜以正名爲先名正則

國威彊歲幣可損因陳選將練兵屯田減租之策孝宗受禪俊卿言爲國之要有三用人賞功罰罪所以行之者至公而已遷中書舍人時孝宗志在興復方以閩外事屬張浚以俊卿忠義沈靖有謀命爲江淮宣撫判官兼權建康府事會主和方堅詔吳玠班師俊卿亦召還上封事曰定規模振紀綱勵風俗明賞罰重名器遵祖宗之法蠲無名之賦隆興初建都督府俊卿除禮部侍郎參贊軍事張浚初謀大舉北伐俊卿以爲未可已而邵宏淵兵潰俊卿退保揚州主和議者幸其敗橫議搖之浚上䟽待罪俊卿亦乞從坐詔貶秩諫臣尹穡附思

退議罷浚都督改宣撫使治揚州俊卿奏浚果不可用
別屬賢將若欲責其後効降官示罰古法也今削都督
重權宣揚州死地如有奏請臺諫沮之人情解體尚何
後効之圖議者但知惡浚而欲殺之不復爲宗社計願
下詔戒中外協濟使浚自効疏再上卽命浚都督且召
爲相卒爲思退穉所擠遣視師江淮俊卿累章請罪以
寶文閣待制知泉州請祠許之及思退被竄太學諸生
伏闕乞召俊卿乾道元年入對上勞撫之因極論朋黨
之弊除吏部侍郎同修國史論人才當以氣節爲主氣
節者小有過當容之邪佞者甚有才當察之錢端禮起

戚里爲叅政窺相位俊卿進讀寶訓適及外戚因言本
朝家法外戚不預政陛下宜謹守端禮憾之知建康府
逾年授吏部尚書時上未能屏鞠戲將游獵白石俊卿
引漢桓靈唐敬穆及司馬相如之言力以爲戒上嘉納
拜同知樞密院事時曾覲龍大淵怙舊恩竊威福俊卿
因事質於上出之事在覲傳三年冬當郊而雷上手詔
戒飭大臣葉顥魏杞坐罷以俊卿參知政事於是政事
稍歸中書四年制授尚書右僕射同中書門下平章事
兼樞密使俊卿以用人爲已任所除吏皆一時選獎廉
退抑奔競或才可用資歷淺密薦於上未嘗語人每接

朝士及牧守自遠至必問以時政得失人才賢否虞允
文宣撫四川俊卿薦其才可相上卽召允文爲樞密使
至則以爲右相俊卿爲左相允文建議遣使金以陵寢
爲請俊卿面陳復手疏以爲未可上御弧矢弦激致目
青俊卿疏言陛下豈樂爲此蓋志圖恢復故閱武備激
士氣耳然臣願陛下任智謀明賞罰恢信義則英聲義
烈不越尊俎固已震懾敵人於萬里之遠豈待區區騎
射於百步間哉曾覲官滿當代俊卿預請處以浙東總
管覲怏怏而去張說爲親戚求官憚俊卿不敢言會在
告請於允文得之俊卿聞敕已出語吏留之說皇恐來

謝允文亦愧猶爲之請俊卿竟不與說深憾之吏部尚書汪應辰與允文議事不合求去俊卿數奏應辰剛毅正直可爲執政上初然之後竟出應辰守平江自是上意鄉允文而俊卿亦數求去明年允文復申陵寢之議上手札諭俊卿俊卿奏陛下痛念祖宗思復故疆臣雖疲駑豈不知激昂仰贊聖謨然於大事欲計其萬全不敢迎合意指誤國事卽杜門請去以觀文殿大學士帥福州陞辭猶勸上遠佞親賢修政攘敵泛使未可輕遣旣去允文卒遣使終不得要領曾覲亦召還建節鉞躋保傅而士大夫莫敢言旣而俊卿請祠歸第弊屋數楹

怡然不介意淳熙二年再命知福州累章告歸除特進
起判建康府兼江東安撫召對命坐賜茶因從容言曾
覲王朴招權納賄朝辭又奏曰去國十年見都城穀賤
人安惟士大夫風俗大變上曰何也俊卿曰向士大夫
奔覲朴之門十纔一二尚畏人知今則公然趨附已七
八不復顧忌矣人材進退由私門大非朝廷美事進少
保累章告老以少師魏國公致仕卒年七十四方屬諸
子勿祈恩澤勿請謚樹碑上嗟悼贈太保謚正獻俊卿
孝友忠敬清嚴好禮平居恂恂若不能言而在朝正色
危論無顧避雅善汪應辰李燾尤敬朱熹屢嘗論薦其

卒也喜感知已不遠千里往哭之又爲撰行狀有集二十卷子守定宓竝知名

宓字師復少登朱熹之門長從黃榦遊以父任歷知安溪縣嘉定七年入監進奏院時宰相史彌遠獨秉政無敢慷慨盡言者宓上封事言宮闈儀刑有未正朝廷權柄有所分政令刑賞多所舛逆奏入彌遠不樂而中宮慶壽三牙獻遺至是爲之罷卻尋遷軍器監簿九年轉對言人主之德貴乎明大臣之心貴乎公臺諫之言貴乎直指陳敝事視前䟽尤剴切宓遂請罷歸在告日擢太府丞不拜出知南康軍改南劔州漳州未行請致仕

寶慶二年提點廣東刑獄章復三上乞不就直祕閣主
管崇禧觀拜祠命而辭職名卒進職一等致仕初宓之
在朝也寺丞丁焞往使金宓歎曰世讎未復何以好爲
餞詩有百年中國豈無人之句後數年聞關外不靖以
書抵焞曰蜀口去關外雖遠實如一身近事可寒心皆
士大夫之罪豈非賄遺不絕之故耶焞深服其言宓天
性剛毅信道尤篤嘗爲朱墨銘謂朱陽墨陰以驗理欲
分寸之多寡自言居官必如顏真卿居家必如陶潛而
深愛諸葛亮身死之日家無餘財庫無餘帛庶乎能蹈
其語者端平初贈直龍圖閣所著書有論語注義問答

春秋三傳抄讀通鑑綱目唐中書贅疣之藁數十卷俱藏于家

虞允文字彬甫隆州人父祺嘗登進士第允文以父任入官亦登進士第歷知渠州秦檜當國蜀士多屏棄檜死高宗欲收用之允文以薦召對論士風之弊以文章進必抑其輕浮以言語進必黜其巧僞以政事進必去其苛刻庶可任重致遠除祕書丞累遷禮部郎官金主亮修汴已有南侵意又隱畫工圖臨安湖山以歸亮賦詩有立馬吳山第一峰之句允文上疏請詔大臣豫思備禦時紹興三十年正月也十月允文使金見運糧造

舟者多辭歸亮曰我將看花洛陽明年允文還奏所見
及亮語申言淮海之備除中書舍人直學士院九月金
主遣其臣造浮梁于淮水上十月金主將兵自渦口渡
淮先是劉錡措置淮東王權措置淮西至是權首棄廬
州錡亦回揚州中外震恐上欲航海陳康伯力贊親征
是月戊午樞臣葉義問督江淮軍允文參謀軍事權又
自和州遁歸錡回鎮江盡失兩淮矣十一月壬申金主
率大軍臨采石而別以兵爭瓜洲朝命成閔代錡李顯
忠代權義問被旨命允文往蕪湖趣顯忠交權軍且犒
師采石丙子允文至采石權已去顯忠未來敵騎充斥

我師三五星散解鞍束甲坐道旁皆權敗兵也允文謂
坐待顯忠則誤國事遂立招諸將勉以忠義或曰受命
犒師不受命督戰他人壞之公任其咎乎允文叱之曰
危及社稷吾將安避至江濱謀者言亮前一日刑白黑
馬祭天誓衆以明日濟江時敵兵四十萬馬倍之宋軍
纔一萬八千允文乃命諸將列大陣不動分戈船爲五
其二竝東西岸而行其一駐中流藏精兵代戰其二藏
小港備不測部分甫畢敵已大呼亮操小紅旗麾數百
艘絕江而來瞬息抵南岸者七十艘直薄宋軍軍小卻
允文入陣中撫統制時俊背曰汝膽略聞四方立陣後

則兒女子爾俊卽揮雙刀出土殊死戰中流官軍亦以
海鱗船衝敵舟皆平沉敵半死半戰日暮未退會有洩
軍自光州至允文授以旗鼓從山後轉出敵疑援兵至
始遁又命勁弓尾擊追射大敗之多俘獲僵尸凡四千
餘敵兵不死于江者亮怒悉敵殺之允文以捷聞犒將
士謂之曰敵今敗明必復來夜半部分諸將分海舟緹
上流別遣兵截楊林口丁丑敵果至因夾擊之焚其舟
三百始遁去再以捷聞顯忠至自蕪湖允文語之曰敵
入揚州必與瓜洲兵合京口無備我當往公能分兵相
助乎顯忠分李捧軍萬六千往京口葉義問亦命楊存

中將所部來會允文還建康卽上䟽言敵敗於采石將
微幸於瓜洲今我精兵聚京口持重待之可一戰而勝
乞少緩六飛之發甲申至京口敵屯重兵塞瓜洲口時
楊存中成閔邵宏淵諸軍皆聚京口不下二十萬惟海
鱸船不滿百戈船半之允文謂遇風則使戰船無風則
使戰艦數少恐不足用遂聚材冶鐵改修馬船爲戰艦
庚寅亮至瓜洲允文與存中臨江按試命戰士踏車船
中流上下三周金山回轉如飛敵持滿以待相顧駭愕
亮笑曰紙船耳一將跪奏南軍有備未可輕顧駐揚州
徐圖進取亮怒欲斬之乙未亮爲其下所殺丙申敵人

退屯三十里遣使議和已亥奏聞召入對上慰藉嘉歎
謂陳俊卿曰虞允文公忠出天性朕之裴度也詔免扈
從往兩淮措置允文至鎮江奏收兩淮三策不報明年
充川陝宣諭使陛辭言金亮旣誅新主初立彼國方亂
天相我恢復也上以爲然允文至蜀與大將吳玠議經
略中原玠進取鳳翔復鞏州金治兵爭陝西新復州郡
蜀士欲棄之允文持不可孝宗受禪朝臣有言西事者
謂官軍進討東不可過寶雞北不可過德順允文爭之
不得吳玠遂歸河池蓋用參知政事史浩議欲盡棄陝
西臺諫袁季任古附和其說允文前後凡十五疏且移

書陳康伯康伯牽於同列不能回也上將召允文問陝西事執政忌其來以顯謨閣直學士知夔州尋又命奏事隆興元年入對史浩旣素主棄地及拜相亟行之且親爲詔有曰棄雞肋之無多免狼心之未已允文入對言今日有八可戰上問及棄地允文以笏畫地陳其利害上曰此史浩誤朕以敷文閣待制知太平州尋除兵部尚書湖北京西宣撫使改制置使時朝廷遣盧仲賢議和湯思退又欲棄唐鄧海泗允文累疏力爭思退怒陽請召允文實欲去之也允文上印猶以四州不可棄爲請乞致仕詔以顯謨閣學士知平江府思退竟決和

議割唐鄧二年金兵復至思退貶上悔不用允文言陳
俊卿亦薦允文堪大用除端明殿學士同簽書樞密院
事乾道元年拜參知政事兼知樞密院事坐論罷奉祠
歸三年召除知樞密院事兼參知政事吳玠卒議擇代
上諭允文曰無以易卿卽以爲四川宣撫使一月召至
闕不數月復使蜀太上賜御書聖主得賢臣頌上爲之
製跋陞辭復以所御雙履及甲冑賜焉五年拜右僕射
同中書門下平章事兼樞密使允文多薦知名士及爲
相籍人才爲三等有所見聞卽記之號材館錄六年陳
俊卿以奏留龔茂良忤上意上震怒俊卿待命浙江亭

兩日不報允文請對極論體貌之道壘拜榻前途命判
福州自莊文太子薨儲位未定允文上疏且屢懇陳未
幾詔恭王惇立爲皇太子會慶節金使烏林答天錫入
見金主壻也驕倨甚固請上降榻問金主起居上不許
天錫跪不起侍臣錯愕失措允文請大駕還禁中且諭
之曰大駕旣興難再御殿使人來且隨班上壽金使慙
而退時改僕射爲丞相乃八年二月授允文特進左丞
相兼樞密使梁克家爲右丞相四月御史蕭之敏劾允
文允文上章待罪上過德壽宮太上曰采石之功之敏
在何許毋聽其去上爲出之敏且書扇製詩留之上命

選諫官允文以李彥穎林光朝王質對久不報曾勸薦
一人賜第擢諫議大夫允文克家爭之不從允文力求
去授少保武安軍節度使四川宣撫使進封雍國公陞
辭上諭以進取之方期以某日會河南允文言異時戒
內外不相應上曰西師出而朕遲回卽朕負卿朕已動
而卿遲回卽卿負朕上御正衙酌酒賦詩以遺之且賜
家廟祭器使蜀一歲無進兵期密詔趣之荅以軍需未
備上不樂淳熙元年卒贈太傅謚忠肅允文姿貌雄偉
慷慨磊落有大志出入將相垂二十年孜孜忠勤無二
焉嘗注唐書五代史藏于家有詩文十卷又有經筵春

秋講義奏議內外志行于世孫剛簡最知名嘉定中召
不至終利路提點刑獄

梁克家字叔子晉江人幼聰敏書過目成誦紹興末進
士第一授平江簽判召爲祕書省正字遷著作佐郎時
災異數見奏宜下詔求言旣得旨遂條六事曰正心術
立紀綱救風俗謹威柄定廟筭結人心累遷中書舍人
乾道三年郊祀雷震復條六事遷給事中事多執奏無
隱每勸上開言路上欣納因命條具風俗之弊乃列四
條曰欺罔苟且循默奔競上嘉獎五年拜端明殿學士
簽書樞密院事遂參知政事又兼知院事在政府與虞

允文可否相濟允文主恢復克家密諫數不合力去
上曰兵終不可用乎克家曰財用不足何以集事上改
容曰朕將思之詰朝上面諭曰朕終夜思卿言至當毋
庸去八年拜右丞相兼樞密使允文旣罷相克家獨秉
政近戚權倖不少假借而外濟以和張說入樞府謀中
傷士夫不附已者克家悉力調護善類賴之議金使朝
見授書儀說欲移文對境以正其禮克家議不合遂求
去以觀文殿大學士知建康府陛辭上以治效爲問克
家勸上無求奇功旣而三省密院卒移牒泗州敵不從
遣泛使來舉朝震駭後二年湯邦彥坐使事貶天下益

服克家謀國之忠淳熙八年起知福州召除醴泉觀使
九年拜右丞相封儀國公逾月而疾十三年以內祠兼
侍讀明年卒年六十贈少師謚文靖克家風度峻整爲
文渾厚明白自成一家辭命尤溫雅多行于世

葉顥字子昂仙遊人登紹興進士第歷知上虞縣賀正
中薦顥靜退遂召見顥論國讎未復其言剴切高宗嘉
納除將作監簿知處州湯思退之兄家奴犯禁一繩以
法思退不悅屬常州連緡錢四十萬守坐免移顥代之
金犯邊高宗視師建康道毗陵顥賜對舟次因言故相
張浚久謫無恙是天留以相陛下也顥初至郡無旬月

儲未一年餘緡錢二十萬累遷端明殿學士參知政事兼同知樞密院事武臣梁俊彥請稅沙田蘆場御史林安宅請兩淮行鐵錢顥力言不可安宅不能平旣入樞府乃上章攻顥御史王伯庠亦論之乃以資政殿學士與祠孝宗下其事臨安府獄奏上以安宅伯庠風聞失實免所居官仍貶安宅筠州召顥赴闕除知樞密院事未拜進尚書左僕射兼樞密使顥首薦汪應辰王十朋陳良翰周操陳之茂芮晔林光朝等可備執政侍從臺諫上嘉納又言自古明君用人使賢使愚使姦使盜惟去泰甚上曰建康劉源嘗賂近習朕欲遣王朴廉其姦

顯曰臣恐廉者甚於姦者乃止乾道三年冬至上親郊而雷顯引漢故事上印綬奉祠歸卒年六十八贈特進謚正簡顯爲人簡易清介與物若無忤至處大事毅然不可奪友人高登嘗上書譏切時相名捕甚急顯與同邸適令逸去登曰不爲君累乎顯曰以獲罪固所願也自初仕至宰相服食僅妾田宅不改其舊

論曰陳康伯抑於秦檜高宗末年始顯用其贊親征及早定太子誠有經濟才隆興召命羣望攸屬奚但器量似謝安乎嗣是賢相有如陳俊卿雅而飭虞允文果而亮梁克家靜而肅葉顥醇而介資識雖殊要皆辨人材

抑僥倖裨益勵精之治實多而允文兼優將略尤爲時倚重云

湯思退

魏杞

蔣芾

葉衡

洪适

史浩

趙雄

王淮

湯思退字進之處州人紹興中由縣令試博學宏詞科除祕書省正字自是登郎曹貳中祕秉史筆繇禮部侍郎除端明殿學士簽書樞密院事遂叅大政秦檜病篤招參知政事董德元及思退至臥內屬以後事各贈黃金千兩德元慮其以我爲自外不敢辭思退慮其以我期其死不敢受高宗以不受金非檜黨信用之歷擢知

樞密院事尚書左僕射侍御史陳俊卿論其巧詐傾邪
所爲多效秦檜蓋思退致身皆檜父子恩也遂罷奉祠
隆興元年符離師潰召思退復相言者論之不報思退
主議割地與金張浚力爭之語在浚傳其冬拜思退左
僕射張浚右僕射浚以金未可與和請上幸建康圖進
兵上詔荆襄川陝嚴邊備謂思退曰金無禮如此卿猶
欲言和今日敵勢非秦檜時比卿議論秦檜不若思退
大駭陰謀陷浚罷之上遂命思退作書許金四郡上聞
有敵兵命思退督江淮軍辭不行金帥僕散忠義自清
河口渡淮言者極論思退急和徹備之罪遂罷相尋責

宋史紀事本末卷四十一
居永州太學生張觀等七十二人上書論思退王之望
尹穉等姦邪誤國招致敵人請斬之思退憂悸死思退
始終與張浚不合浚以雪恥復讎爲志思退每借保境
息民爲口實更勝迭負思退之計迄行終亦不免敵旣
得海泗唐鄧又索商秦皆思退力也

魏杞字南夫壽春人祖蔭入官登進士第歷宗正少卿
湯思退建和議命杞使金孝宗面諭今遣使一正名二
退師三減歲幣四不發歸附人杞條上十七事擬問對
上隨事畫可陛辭奏曰臣將指出疆其敢不勉萬一無
厭願速加兵上善之行次盱眙金所遣大將僕散忠義

石烈志寧等方擁兵闖淮遣權泗州趙房長問所以
求意求觀國書杞曰書御封也見主當廷授房長馳白
僕散忠義疑國書不如式又求割商秦地及歸正人且
欲歲幣二十萬杞以聞上命盡依初式再易國書歲幣
亦如其數忠義以未如所欲遂與志寧分兵犯山陽戰
不利驍將魏勝死之上怒金反覆詔以禮物犒督府師
杞奏金若從約而金繒不具豈不瘠國體格事機乎乃
以禮物行至燕見金主裒具言天子神聖才傑奮起人
人有敵愾意北朝用兵能保必勝乎和則兩國享其福
戰則將士蒙其利昔人論之甚悉金君臣環聽拱竦館

伴張恭愈以國書稱大宋脅去大字杞拒之卒正敵國
禮損歲幣五萬不發歸正人北還上慰藉甚渥一歲間
遷至右僕射兼樞密使上銳意恢復杞爲相左右其論
會郊祀冬雷用漢制策免守左諫議大夫奉外祠起知
平江府諫官王希呂論杞奪職後再奉祠告老復資政
殿大學士卒贈特進謚文節

蔣芾字子禮之奇曾孫也紹興二十一年進士第二人
孝宗累遷起居郎兼直學士院簽書樞密院事首奏加
意邊防又奏拔將才行伍間籍記姓名以待用除權參
知政事同知國用事芾奏方今財費於養兵藝祖取天

下不過十五萬人紹興初外有大敵內有巨寇然兵數亦不若今日之多又招兵耗蠹愈甚上悟一日因進呈邊報上顧曰將來都督非卿不可芾奏臣未嘗經歷兵間陛下更審思其人明年拜右僕射同中書門下平章事兼樞密使母卒起復拜左僕射力辭有密旨欲今歲大舉手詔廷臣議芾奏天時人事未至拂上意服闋除觀文殿大學士知紹興府提舉洞霄宮尋被論落職建昌軍居住期年聽自便再與祠卒芾始以言邊事結上知不十年致相位終以不能任兵事受責云

葉衡字夢錫金華人登紹興十八年進士第調寧德簿

改秩知於潛縣治爲諸邑最郡以政績聞卽召對上曰
聞卿作縣有法遣還任擢知常州累遷戶部尚書簽書
樞密院事拜參知政事時淳熙元年也衡奏二事一牧
守將帥必擇材以稱其職必久任以盡其材二令戶部
取湖廣會子實數盡以京會立限易之從之其冬拜右
丞相兼樞密使孝宗銳意恢復凡將帥器械山川防守
悉經思慮奏對畢從容賜坐講論機密或不時召對上
諭執政選使求河南衡奏司諫湯邦彥有口辨邦彥恨
衡擠已聞衡對客有訕上語奏之上大怒卽日罷相責
授中德軍節度副使郴州安置邦彥使還果辱命上展

怒竄之嶺南旣而詔衡自便復官與祠年六十二卒贈資政殿學士衡負才智理兵事甚悉由小官不十年至宰相人謂出於曾覲云

洪适字景伯皓長子也以父出使恩補修職郎紹興十二年與弟遵同中博學宏詞科高宗曰父在遠方子能自立此忠義報也擢除敕令所刪定官後三年弟邁亦中是選由是三洪文名滿天下改祕書省正字結歸忤秦檜出知饒州适亦出爲台州通判皓謫英州适復論罷往來嶺南省侍者九載檜死起知荊門軍改知徽州歷升尚書戶部郎中總領淮東軍馬錢糧孝宗卽位海

州解圍符離用兵饋餉繁夥适究心調度供億無闕遷
司農少卿隆興二年召貳太常兼權直學士院除中書
舍人時金人再犯淮羽檄沓至書詔填委咨訪躊躇率
稱上旨自此有大用意金旣尋盟首爲賀生辰使得其
要領以歸乾道元年五月遷翰林學士仍兼中書舍人
秦埴久廢忽予祠适論寢時巫伋復召莫伋擢樞密院
編修官余堯弼復龍圖閣學士适謂其皆檜黨隨命繳
之六月除端明殿學士簽書樞密院事八月拜參知政
事諫議大夫林安宅請禁銅錢入北境卽蜀中取鐵錢
行之淮上适言其不可乃寢前命十二月拜尚書右僕

射同中書門下平章事兼樞密使未幾春霖适引咎乞
退林安宅抗疏論适既而臺臣復合奏除觀文殿學士
奉祠尋起知紹興府浙東安撫使再奉祠卒年六十八
謚文惠适以文學聞望遭時遇主然無大建明以究其
學家居十有六年兄弟鼎立子孫森然以著述吟詠自
樂近世備福鮮有及之或謂适黨湯思退又謂适來自
淮東言張浚妄費浚以此罷相云

史浩字直翁鄞縣人高宗時登進士第歷司封郎官兼
建王府直講一日講周禮言膳夫掌膳羞之事歲終則
會惟王及后世子之膳羞不會至酒正掌飲酒之事惟

王及后不會世子不與焉以是知世子飲酒不可無節也王嘉納遷宗正少卿王立爲皇太子浩除起居郎兼太子右庶子孝宗立連擢翰林學士知制誥議城瓜洲采石張浚以爲不可語在浚傳擢參知政事詔議應敵定論浩奏先爲備禦是謂良規儻聽淺謀之士興不教之師謂之恢復得乎拜尚書右僕射首言趙鼎李光無罪岳飛久冤宜復官爵祿其子孫從之張浚請幸建康上以問浩浩陳三說不可退詰浚曰帝王之兵當出萬全豈可嘗試圖僥倖復辨論於殿上浚因內引奏浩意不可回恐失機會乞出英斷浩在省中忽得邵宏淵出

五代始知不由三省徑檄諸將浩語陳康伯曰吾屬傷
右府而出兵不與聞不去何待乎因奏言康伯欲納
歸正人臣恐他日必爲陛下子孫憂浚銳意用兵若一
失之後恐陛下終不得復望中原侍御史王十朋論其
懷姦誤國出知紹興先是浩因城瓜洲白遣太府丞史
正志往視之正志與浚論辨十朋疏正志朋比併及浩
遂與祠凡十三年復起與郡淳熙五年復爲右丞相殿
前司輒捕市人京城騷動軍人怙衆因奪民財浩奏盡
釋所捕而禽軍民首謹叟者欲成議罪欲各取一人梟
首以徇浩曰軍人始釁市人可同罰乎陛下恐軍人有

語故一其罪以安之夫民不得其平言亦可畏尋求去
拜少傅保寧軍節度使充醴泉觀使兼侍讀後有言市
人陸慶童之冤者上曰史浩嘗力爭至今悔之劉光祖
試館職答策論取士之道上批其後略曰國朝以來過
於忠厚宰相誤國大將敗軍未嘗誅戮要在人君擇相
相當爲官擇人懋賞立乎前誅戮設乎後人才不出吾
不信也中外聞之大聳議者謂曾覲視草爲光祖甲科
發也上遣覲持示浩浩奏爲國底於忠厚豈有所謂過
哉臣恐議者以陛下自欲行刻薄之政歸過祖宗不可
不審也自經筵將告歸乃於小官中薦江浙之士十五

人皆一時是如薛叔似楊簡陸九淵石宗昭陳謙葉適
袁燮趙靜之張子智後皆擢用十年請老除太保致仕
封魏國公光宗御極進太師年八十九卒封會稽郡王
寧宗賜謚文惠御書純誠厚德元老之碑後改封越王
謚忠定配享孝宗廟庭浩喜薦人才嘗擬陳之茂進職
與郡之茂嘗毀浩上曰卿豈以德報怨耶對曰臣不知
有怨若以爲怨而以德報之是有心也莫濟狀王十朋
行事詆浩尤甚浩薦濟掌內制上曰濟非議卿者乎對
曰臣不敢以私害公其實厚類此子彌遠別有傳
趙雄字溫叔資州人隆興元年類省試第一虞允文宣

撫西蜀辟幹辦公事入相薦于孝宗召見大奇之除正
字范成大使金將行雄當登對允文招與之語旣進見
雄極論恢復上大喜曰功名與卿共之卽除右史兩月
除舍人雄請復置恢復局日夜講磨條具合上意除中
書舍人自選人入館至此未滿歲也時金將起河南之
役議盡以諸陵梓宮歸于我上命雄出使賀生辰仍止
奉遷陵寢及正受書儀雄見金主爭辨數四其臣屢喝
起辨益力卒得請乃已金人謂之龍鬬嘗上䟽論恢復
謂莫若由蜀以取陝西得陝西以臨中原是秦制六國
之勢也淳熙中歷兩府拜右丞相祖宗時蜀人未嘗除

蜀帥雄請外除觀文殿大學士四川制置使御史以非
故事疏論之改知瀘南安撫使上思雄不忘改知江陵
府張栻再被召論恢復固當第其計非是卽奏疏上大
喜翌日以疏宣示云恢復當如栻所陳方是卽除侍講
云且得直宿時與卿論事允文與雄之徒不樂沮抑之
時司天奏相星在楚地上曰張栻當之人愈忌光宗將
受禪召雄雄上萬言書甚剴切授寧武軍節度使開府
儀同三司進衛國公改帥湖北疾甚改判資州又除潼
川府改隆興府卒年六十五贈少師寧宗謚文定
王淮字季海金華人登紹興進士第累遷右正言首論

大臣養尊小臣持祿願正心以正朝廷正朝廷以正百官宰相湯思退無物望淮條其罪策免至於吏部侍郎沈介之盜名都司方師尹之狡險大將劉寶之倍克結權倖皆劾罷之又奏自治之策孝宗嘉歎除祕書少監兼恭王府直講與錢端禮不合出知建寧府改浙西提刑入見陳閩中利病甚悉召遷至翰林學士知制誥又自簽書樞密除同知參大政時宰相久虛淮與李彥穎同行相事擢樞密使上謂之曰陳康伯雖有人望處事則不及卿拜右丞相兼樞密事先是自夏不雨至秋是日甘雨如注士大夫相賀趙雄罷相蜀士在朝者皆有

意淮謂此唐季黨禍之胎也豈聖世所宜有皆以次
進遷蜀士乃安章穎論事任直上將黜之淮曰陛下樂
聞直言士大夫以言相高黜之適成其名穎復留時以
荒政爲急淮言李椿年老成練達擬除長沙帥朱熹學
行篤實擬除浙東提舉以倡郡國成都闕帥上加訪問
淮以留正對上曰非閩人乎淮曰立賢無方湯之執中
也必曰閩有章子厚呂惠卿不有曾公亮蘇頌蔡襄乎
必曰江浙多名臣不有王欽若乎上稱善拜左丞
相上章力求去以觀文殿大學士判衢州力辭改宮祠
光宗時卒贈少師謚文定初朱熹提舉浙東劾台守唐

仲友淮素善仲友不喜熹乃擢陳賈爲監察御史攻論學其後慶元僞學之禁始於此

論曰湯思退襲秦檜狡謀割地畀敵敵得地而勢彌張竄死不足以償責魏杞蔣芾葉衡竝驟處非據廢黜亦宜洪适乏建白惟以文行名或目爲思退黨何與史浩棄雞肋以啗狼心殊爲非計然於人無怨德贊其君行忠厚之政則盛德事也若趙雄排張拭王淮傾朱熹浩豈肯爲哉

宋史新編卷一百四十二

列傳八十四

明南京戶部主事莆田柯維騏著

張綱

辛次膺

劉珙

王剛中

黃祖舜

汪澈

周葵

王之望

錢端禮

張綱字彥正丹陽人入太學以上舍及第歷校書郎入對請法祖考躬行之教以化天下徽宗稱善論事與蔡京不相合黜主管玉局觀久之還故官稍遷敘高宗累遷起居舍人改中書舍人試給事中宗室令憲特轉太中大夫綱言崇寧以來官職不循資任致綱紀大壞今

方丕變其俗奈何以令憲故復違舊章詔以次官命詞
舍人王居正復執不行命遂寢除給事中侍御史魏珏
劾綱與祠進微猷閣待制引年致仕秦檜用事久綱臥
家二十年絕不與通問檜死召爲吏部侍郎兼侍讀已
而權吏部尚書除參知政事告老以資政殿學士知婺
州尋致仕孝宗登極召陪祀南郊以老辭不至詔嘉之
命有司存問卒年八十四綱嘗書坐右曰以直行已以
正立朝以靜退高天下其篤守如此初謚文定吏部尚
書汪應辰論駁之孫釜再請特賜曰章簡釜慶元間爲
諫官力排道學諸賢累官至簽書樞密院事

次膺字起季萊州人甫冠登進士第歷官駕部遷吏部郎湖北運判中途召還見高宗于建康首言救世之弊上稱善擢右正言王倫使北請和次膺言宣和海上之約靖康城下之盟口血未乾兵隨其後今日之事當識其詐時秦檜在政府次膺劾其妻兄王仲疑王喚不法章留中次膺再論之曰貴連宮掖親如肺腑寵任非宜臣亦得論之而大臣之姻婭乃不得繩之耶求去除直祕閣湖南提刑先是湖南賊龍淵李朝擁衆數萬據茶陵檜匿不奏次膺陛辭上曰卿以將母爲請朕不得留湖湘風物甚佳且無盜賊職名異恩卒歲當召旣抵

長沙賊勢方張始悟檜欲陷之卽單車趨茶陵擒賊驍
將戮之募賊黨齎榜諭降待以不死皆相繼降金好成
赦書至衡陽次膺極陳其詐書奏不報金陷三京次膺
罷奉祠秦檜以其負重名欲先移書當稍收用次膺笑
而不答閱十六年貧益甚亡毫髮求於人檜死起知婺
州俄被召以足疾求去加祕閣修撰還郡再召見因奏
國本未立上改容曰誰可次膺曰知子莫若父上稱善
擢權給事中坐駁戶部侍郎蔣璨爲中丞湯鵬舉所論
與祠起知泉州移福建帥丁母憂乞納祿孝宗卽位手
詔趣召除御史中丞時兩淮盡爲荒野次膺奏乞集遺

歸業借種牛或令在屯兵從便耕種此足兵良法至
若成閔之貪饕湯思退之朋附葉義問之姦罔皆以次
論劾上方厲精政事次膺每以名實爲言多裨益呼其
官不名隆興改元同知樞密院事拜參知政事以疾力
祈免且奏曰王十朋除侍史雖上親擢天下皆知臣嘗
薦其賢湯思退召將至亦知臣嘗疏其姦臣不引避人
其謂何除資政殿學士奉祠陞辭賜茶甚惜其去次膺
奏臣與思退理難同列上曰有謂湯思退可用者次膺
奏今日之事恐非思退能辦思退固不足道竊恐誤國
家事卒年七十九次膺孝友清介立朝謇諤仕宦五十

年無絲毫挂吏議爲政貴清靜先德化所至人稱其不煩善屬文尤工於詩

劉珙字共父子羽長子也生有奇質從季父子輩學以蔭補承務郎登進士乙科監紹興府都稅務請祠歸杜門力學不急仕進後歷禮部郎官秦檜欲追謚其父召禮官會議珙不至檜風言者逐之檜死召爲大宗正丞累遷中書舍人直學士院出知泉州改衢州湖南旱盜李金起朝廷憂之以珙知潭州湖南安撫使珙移書制使沈介請以便宜出師曰擅興之罪吾自當之介卽遣兵至連戰破賊賊黨執李金降支黨聽其自降相率納

給據歸田里孝宗賜璽書褒獎除翰林學士知制誥
兼侍讀已而拜中大夫同知樞密院事兼參知政事時
上欲召曾覲以珙言而止殿前指揮使王琪被旨按視
兩淮城壁還密薦和州教授劉甄夫上諭執政召之珙
請曰此人名位微何自知之上以珙告琪與陳俊卿遂
奏罷琪珙時爭之尤力殿中皆驚以故獨罷爲端明殿
學士奉外祠陳俊卿奏留乃改知隆興府江西安撫使
入辭猶以六事爲獻上嘉其忠除資政殿學士知荊南
府湖北安撫使以繼母憂去起復同知樞密院事荊襄
安撫使珙據禮懇辭亦恥與張說並命也最後言曰三

年通喪三代未之有改漢儒乃有金革無避之說已爲先王罪人今邊陲幸無犬吠之驚臣乃欲冒金革之名以私利祿之實不亦又爲漢儒之罪人乎服闋再除知潭州湖南安撫使過闕入見極論時事進資政殿大學士以行淳熙二年移知建康府江東安撫使行宮留守進觀文殿學士屬疾請致仕孝宗遣中使以醫來疾革草遺奏言恭顯任文近習用事之戒今以腹心耳目寄之此曹朝綱以紊士氣以索民心以離咎皆在此陳俊卿忠良確實可以任重致遠張栻學問醇正可以拾遺補闕願亟召用旣又手書訣栻與朱熹皆以未能爲國

報雪儲恥爲恨卒年五十七贈光祿大夫謚忠肅珙精
明果斷事繼母以孝聞功總之戚必素服以終喜受盡
言事有小失下吏言之立改臨數鎮民愛若父母聞訃
有罷市巷哭相與祠之者

王剛中字時亨樂平人進士第二人得除州推官改左
宣義郎故事當召試秦檜怒其不詣已授洪州教授檜
死召見擢祕書省校書郎累遷中書舍人會西蜀謀帥
遣以剛中知成都府制置四川進至敷文閣直學士剛
中檢身以法示人以禮不立崖塹恩威並行羽檄紛沓
從容裁決皆中機會敵騎度大散關人情洶洶剛中跨

一馬夜馳二百里起吳璘於帳中責之曰大將與國義
同休戚臨敵安得高枕而臥璘大驚又以蠟書抵張正
彥濟師西師大集金兵敗走剛中倍道馳還謂其屬李
燾曰將帥之功吾何有焉燾嘆曰身督戰而功成不居
過人遠矣成都萬歲池廣袤十里溉三鄉田歲久淤澱
剛中集三鄉夫共疏之累土爲防上植榆柳表以石柱
州人指曰王公之甘棠也葺諸葛武侯祠張文定公廟
夷黃巢墓表賢殫惡以示民孝宗受禪以宮僚進秩召
赴闕請祠歸次番陽營圃植竹號竹塢金犯淮有旨趣
剛中入見陳戰守之策連擢端明殿學士同知樞密院

事剛中曰戰守者實事和議者虛名不可恃虛名害實
事又奏四事聞屯田省浮費選將帥汰冗兵屬疾卒年
六十三贈資政殿大學士光祿大夫謚恭簡剛中絲布
衣至公卿無他嗜好惟讀書著文爲樂有易說春秋通
義仙源聖紀經史辨漢唐史要覽天人修應錄東溪集
應齋筆錄凡百餘卷

黃祖舜福清人登進士第累任至倉部郎中遷右司郎
中權刑部侍郎兼詳定敕令司兼侍講進論語講義上
令國子監板行兼權給事中張浚沒其家奏留使臣五
十餘人理資任祖舜言素食進秩曷以勸功乞爲限制

乃詔勲臣家兵校留五之一時閣門有以恩澤補者修撰有不由文學擢者祖舜皆論寢其命楊愿家乞遺表恩祖舜言愿陰濟秦檜中傷善類事遂止檜子煇贈太傅祖舜言煇濟惡追奪之遷同知樞密院事隆興初以資政殿學士知潭州卒謚莊定

汪澈字明遠自新安徙居饒州第進士教授衡州沅州以薦爲祕書省正字校書郎輪對合高宗意除監察御史進殿中侍御史特賜鞍馬時和戎歲久邊防浸弛澈陳養民養兵自治豫備之說累數千言除侍御史同陳俊卿劾罷左相湯思退又論鎮江大將劉寶十罪奪節

十司殿帥楊存中久握兵權內結闔寺王十朋陳俊卿等相繼論劾帝欲存護使去澈與俊卿同具奏存中始罷會金使高景山來求釁端澈言天下之勢彊弱無定形在吾所以用之願陛下赫然睿斷益兵嚴備布告中外將見上下一心其氣百倍矣除御史中丞尋爲湖北京西宣諭使鄂帥田師中老而怯立奏易之時欲置襄守荆南澈奏襄陽地重爲荆楚門戶不可棄未幾金主亮死澈乞出兵淮甸與荆襄軍夾擊其歸師未報而金新主罷兵請和召澈爲參知政事與宰相陳康伯贊內禪孝宗卽位銳意恢復首用張浚使江淮澈以參豫督

軍荆襄將分道進討隆興元年入奏還武昌而張浚剋期大舉詔澈出師應之澈以議不合乞令浚併領荆襄諫議大夫王大寶論澈無制勝策乞罷黜澈亦請祠許之大寶疏再上落職仍祠祿明年知建康府尋除樞密使在位二年以觀文殿學士復奉祠尋知鄂州兼安撫使時議廢江州軍澈言不可知寧國府改福州福建安撫使請祠尋致仕卒年六十三贈金紫光祿大夫謚莊敏澈爲殿中日薦陳俊卿王十朋陳之茂爲臺官高宗次第用之在樞府孝宗密訪人材薦百有十八人嘗奏言臣起寒遠所以報國惟無私不欺亦自奉清約雖貴

猶布衣時有文集二十卷奏議十二卷

周葵字立義宜興人進士甲科歷殿中侍御史兩月間
言事至三十章張浚議北伐葵上章力言此存亡之機
非獨安危所係或言葵沮大計罷爲司農少卿以直祕
閣知信州未上改湖南提刑以親老易江東皆不就和
議已定被召論爲國有道戰則勝守則固和則久不然
三者在人不在我矣除太常少卿時秦檜獨相意葵前
事必憾趙鼎再除殿中侍御史葵語人曰元鎮已貶葵
固不言雖門下客亦不及之也檜始不樂因林待聘之
訴檜卽奏徙葵起居郎語在梁汝嘉傳再落職與祠檜

死連擢權禮部侍郎尋兼國子祭酒又兼權給事中侍御史湯鵬舉言葵以魏良臣薦躡處侍從呂廣問葵之死黨乞併罷之太學生黃作詹淵率諸生都堂投牒留葵翌日博士何備等言于朝乞懲戒詔作淵皆送五百里外州編管葵出知信州隨罷復起知信州引疾奉興國祠復知太平州婺州進至敷文閣待制孝宗卽位除兵部侍郎兼侍講改同知貢舉兼權戶部侍郎張浚自督府來朝密言敵失泗州其懼罪者皆欲來歸願遣軍渡淮赴之此恢復之機也葵請對謂不可輕舉累數百言及遣李顯忠邵宏淵取靈壁虹二縣敗績上思其言

拜參知政事葵始終守自治之說兼權知樞密院事臺
諫交章言議和太速葵與陳康伯湯思退乞令侍從臺
諫集議衆益洶洶諸公待罪乞罷不許葵獨留身固請
上曰卿何請之力也曰自預政以來每與宰相論事有
以爲然而從者有不得已強從者有絕不肯從者十常
四五洎至楊前陛下又或不然大率十事之中不從者
七八安得不愧於心此臣所以欲去也虞允文陳康伯
相葵卽求退除資政殿學士提舉洞霄宮起知泉州告
老加大學士致仕閒居累年不以世故縈心卒年七十
七累贈太傅葵孝於事親當任子先孤姪其卒也幼子

與孫尚未命平生問學不泥傳注作聖傳詩二十篇文集三十卷奏議五卷晚號惟心居士謚惠簡

王之望字瞻叔襄陽人父綱登進士第至通判徽州之望以蔭補復登進士第歷陞太府卿孝宗卽位除戶部侍郎充川陝宣諭使代虞允文贊吳璘棄德順敵乘其後喪師二萬人將校所存無幾連營慟哭聲震原野上聞而悔之隆興初言者疏之望罪除集英殿修撰奉祠未幾權戶部侍郎江淮都督府參贊軍事累擢右諫議大夫之望因上章極言廷臣執偏見爲身謀乞明詔在庭平其心於議論之際時思退主和議浚主恢復之望

陰爲思退地也拜參知政事旣入俄兼同知樞密院事
敵兵交至以參知政事勞師江淮之望先嘗貽書敵帥
至是王朴使敵軍并割商秦地許歸被俘人世爲叔姪
之國敵皆聽許講解而罷上聞敵師退令督府擇利擊
之之望下令諸將不得妄進朝廷趣行之望言王朴旣
還不可冒小利害大計言者復論罷爲端明殿學士仍
奉祠居天台乾道元年起知福州福建路安撫使捕海
賊王大老捷聞加資政殿大學士移知溫州尋復罷之
望有文藝幹略當秦檜時落落不合或謂其有守紹興
末年力附和議與思退相表裏專以割地啖敵爲得計

地割而敵勢益張之望迄以此廢焉

錢端禮字處和臨安人父忱在外戚傳端禮以恩補官至右文殿修撰仕外服有聲高宗材之知臨安府升權戶部侍郎兼樞密都承旨符離失利湯思退倡和議端禮亦奏賈怨生事思退大喜奏除戶部侍郎未幾兼吏部張浚方主戰孝宗甚鄉之思退諛求去端禮請對乞留又奏兵者凶器願以符離之潰爲戒於是思退復留命浚行邊還戍兵罷招納以端禮充淮東宣諭使王之望使淮西端禮入奏兩淮名曰備守守未必備名曰治兵兵未必精端禮旣以是詆浚右正言尹穡亦劾浚罷

鄧督自此議論歸一矣端禮至淮還極言守備疎略宜早定和議遂除吏部侍郎再往淮上金帥僕散忠義分兵入上意中悔令思退都督江淮軍馬端禮試兵部尚書參贊軍事思退畏怯不行端禮赴闕兼戶部尚書俄拜端明殿學士簽書樞密院事兼權參知政事端禮以和議既定乞降詔除參知政事兼權知樞密院事時久不置相端禮以首參關相位甚急皇長子鄧王夫人端禮女也殿中侍御史唐堯封論端禮帝姻不可任執政不報遷太常少卿館閣士相與上疏排端禮皆坐絀刑部侍郎王弗陰附端禮建爲國是之說吏部侍郎陳俊

卿抗疏力詆其罪且謂本朝無以戚屬爲相上納其言
鄧王立爲太子端禮引嫌奉祠起知寧國府移紹興進
觀文殿學士端禮籍人財產至六十萬緡有詣闕陳訴
者上聞之與舊祠侍御史范仲芑劾隆一職旣而復之
卒贈銀青光祿大夫謚忠肅孫象祖自有傳

論曰張綱見擠蔡京弗通秦檜書以靜退高天下辛次
膺亦與檜迂斥湯思退之奸居約而操彌勵劉珙恥附
權倖復讎雪恥垂沒有餘心王剛中戮力破敵不以和
好輟備禦黃祖舜爲國家惜名器褫之於匪人皆有古
大臣風也汪澈周葵當廷議恢復頗有異同然於平生

大節何損日之望錢端禮並附奸樹黨誣誤人主而竟免流竄孝宗亦是乎失刑矣

蕭燧

李彥穎

黃洽

施師點

范成大

龔茂良

蕭燧字照鄰臨江軍人進士高第授平江府觀察推官時秦檜當國其親黨密告燧秋試必主文漕臺燧詰其故曰丞相有子就舉欲以屬公燧怒曰初仕敢欺心耶檜懷之既而被檄秀州至則員溢就院易一員往漕闈秦熺果中前列秋滿當爲學官避檜調靜江府察推而歸燧未第時夢神人示以文書記其一聯云如火烈烈

金石俱焚在冬青青松栢不改已而果符前事孝宗初
自靖州教授除諸王宮大小學教授輪對論官當擇人
不當爲人擇官上喜製用人論賜大臣淳熙中累遷左
司諫上諭執政蕭燧若何龔茂良奏燧純實無華宜任
言責擢右諫議大夫入謝上以議論鯁切不求名譽糾
正姦邪不恤仇怨嘉獎之叅政趙雄庇夔帥李景覃恣
其貪虐臺臣謝廓然不敢論燧奏罷景覃雄營救復任
燧再論併及雄雄密奏燧誤聽景覃仇人之言遂下臨
安府捕恭州士人鍾京等置之獄坐以罪景覃復依舊
職燧乃自劾詔以風聞不許竟力求去徙刑部侍郎不

拜固請補外知嚴州嚴地狹財匱始至官鋸不滿三千
燧儉以足用二年之間積至十五萬以其羨補積逋諸
色皆寬詔治郡有勞除敷文閣待制移知婺州父老遮
道幾不得行婺與嚴鄰人熟知條教不勞而治後召遷
至參知政事又權知樞密院以年及自陳上留之不可
除資政殿學士與郡復請閒與祠卒年七十七謚正肅
孝宗每稱其全護善類誠實不欺手書二十八將傳以
賜子達登進士第官至太常

李彥穎字彥叔德清人登進士第歷建德丞改秩時宰
知其才將處之學官彥穎恥自獻調富陽丞御史周樸

薦爲御史臺主簿金敗盟張浚督師進討孝宗方向浚
執政堅主和陳良翰周操不以爲然右正言尹穡陰附
執政薦引同己者轉言和於上前上惑之罷督府良翰
操相繼黜而穡進遷諫議大夫一日穡以和戰守扣彥
穎荅曰人所見固不同公旣以和議爲是曷不明陳於
上前以身任之事成歸於公不成奉身而退若欲享
其利而不及其害國事將誰倚穡大怒曰自爲諫官前
後百餘奏曷嘗及一和字而臺簿有是言自是銜彥穎
陰排之改國子博士權吏部郎中歷升詹事兼吏部侍
郎權尚書兼侍讀時廷臣多以中批斥去彥穎言臣下

有過宜顯逐之使中外知獲罪之由以爲戒今譖毀潛
行斥命中出將恐陰邪得伸善類喪氣非盛世事也除
吏部尚書旣而自簽書樞密擢參知政事彥穎在東府
三歲實攝相事內降繳回甚多內侍白劄籍名造器械
并犒師降旨發左藏封樁諸庫錢動億萬計彥穎疏歲
中經費以進因言虞允文建此庫以備邊故曰封樁陛
下方有意恢復苟川之不節徒啓他日妄費失封樁初
意上默然曰卿言是朕失之矣墜馬在告力求去以資
政殿學士知紹興府勤約有惠政與祠復參知政事諫
官論其子歐人至死與祠鑄秩起知婺州復知紹興府

進資政殿大學士再奉祠進觀文殿學士致仕家居凡
十載自奉澹約食糲米數合室無姬媵蕭然求日與州
縣了不相聞卒年八十一贈少保諡忠文子沐慶元中
與一時臺諫排趙汝愚善類一空公論醜之

黃洽字德潤福州人隆興初以太學生試春官第二詔
循故事未臨軒賜第二人及第授紹興府觀察判官歷
右正言除侍御史所論列未嘗擲撚細故他惡以累其
終身除右諫議大夫上銳志肄武洽因風諫言願之大
象君子以慎言語節飲食言語飲食猶謹節之況其他
乎凡筋力喘息之間一有過差皆非所以養其身也上

嘉納之治在經筵言人主命相任則勿疑宰相重則朝廷尊朝廷尊則廟社安宰相掄才堂蓋公心君子進則庶職舉庶職舉則天下治上首肯再三乃曰卿如良金美玉渾厚無瑕天其以卿爲朕弼耶白御史中丞擢參知政事上因商確除目洽罄竭無所顧避上大喜曰五十年無此差除除知樞密院事累章求去以資政殿大學士知隆興府光宗立詔言事洽奏用人爲萬世不易之論臣前以此納忠壽皇今復告于陛下屢乞歸田畀宮祠方未得請也入勸之治第洽曰吾書生蒙拔擢至此未有以報國先營私乎使吾一旦罪去猶有先人敝

盧可庇風雨夫復何憂慶元二年致仕洽常言居家不欺親仕不欺君仰不欺天府不欺人幽不欺鬼神何用求福報哉卒年七十九贈金紫光祿大夫洽質直端重有大臣體兩朝推爲名臣有文集奏議八十五卷

施師點字聖與上饒人弱冠游太學司業高宏盛稱其文尋授學職以舍選奉廷對調除臨安府教授乾道元年陳康伯薦賜對言歷年屢詔恤民而惠未加洽願因明堂肆赦蠲除逋負從之淳熙八年兼權禮部侍郎除給事中時太子詹事已除特增員爲二命兼之賜對言比年人物彫散士氣耗爾當廣儲人材以待用奉使金

廷立班旣定相儀者以親王將至命師點退位請數四
師點正色曰班立已定尚欲何爲在廷相顧駭愕知其
有守不敢復以爲請使還上嘉歎不已十年連除參知
政事兼同知樞密院事十四年除知樞密院事師點倦
倦搜訪人才手書置夾袋中謂蜀去朝廷遠人才難以
自見蜀士之賢者俾各疏其所知差次其才行文學每
有除授必列陳之明年以資政殿大學士知泉州繼與
臨安祠紹熙二年除知隆興府江西安撫使師點嘗謂
諸子曰吾平生仕宦皆任其升沉初未嘗枉道附麗獨
人主知之遂至顯用夫人窮達有命不在巧圖惟忠孝

乃吾事也卒年六十九贈金紫光祿大夫有文集奏議制藁東宮講議及易說史識諸書

范成大字致能吳郡人登進士第累遷吏部郎官言者論其超躡罷奉祠起知處州陛對論力之所及者三曰日力曰國力曰天力今盡以虛文耗之孝宗嘉納處民以爭役踴訟成大爲勸義役隨家貧富輸金買田助當役者甲乙輪第民便之詔頒其法於諸路處多山田成大訪通濟堰故迹復之置隄關止水則溉灌有序民食其利除禮部員外郎兼崇政殿說書隆興再講和失定受書之禮上嘗悔之遷成大起居郎假資政殿大學士

允金祈請國信使國書專求陵寢蓋泛使也上面諭
書事成大乞併載書中不從金逆使者慕成大名至求
市饋効之至燕山密草奏具言受書式懷之入初進國
書詞氣慷慨金君臣方傾聽成大忽奏曰兩朝旣爲叔
姪而受書禮未稱臣有疏摺笏出之金主大駭曰此豈
獻書處耶左右以笏標起之成大吃不動必欲書達旣
而歸館所金主遣伴使宣旨取奏成大之未起也金庭
紛然太子欲殺成大越王止之竟得全節而歸除中書
舍人初御書崔寔政論賜輔臣成大奏謂聖意在飭綱
紀振積敝而近日大理議刑遽加一等此非以嚴致平

乃酷也上稱爲知言張說除簽書樞密成大當制留詞
頭不下又上疏言之命竟寢知靜江府改除敷文閣待
制四川制置使蜀知名士孫松壽年六十餘樊漢廣甫
五十九皆掛冠不仕表其節詔召之皆不起蜀士由是
歸心召對連擢參知政事逾月爲言者所論奉祠起知
明州尋帥金陵以病請閒再奉祠進至資政殿大學士
卒成大有文名尤工於詩自號石湖有石湖集攬轡錄
桂海虞衡集行于世

龔茂良字實之興化軍人登進士第歷祕書省正字累
遷吏部郎官張浚視師江淮茂良言景德之勝本於能

新靖康之禍在於致疑願法其斷勿蓄其疑除監察
史水災應詔疏曰水至陰其占爲女寵爲嬖佞爲小人
專制蓋指內侍梁珂曾覲龍大淵也遷右正言會內侍
李珂沒贈節度謚靖恭茂良諫寢其謚又極論大淵覲
二人害政甚珂百倍孝宗諭以皆潛邸舊有文學敢諫
爭未嘗預外事翌日再疏不報卽家居待罪章再上除
太常少卿五辭不拜除直祕閣知建寧府請祠不允二
人旣逐起廣東提刑就知信州召對崇政殿左丞相陳
俊卿欲留之右相虞允文不樂會俊卿亦罷除直顯謨
閣江西運判兼知隆興府上念江西連歲大旱以一路

荒政付之茂良發廩振贍加右文殿修撰再任疫厲大作命醫治療全活數百萬進敷文閣待制除禮部侍郎明日拜參知政事葉衡罷上命茂良以首參行相事宣諭獎用廉退茂良奏朱熹操行耿介請錄用除祕書郎爲羣小讒毀未幾手詔付茂良謂虛名之士恐壞朝廷熹迄不至錢良臣侵盜大軍錢糧累數十萬茂良奏其事手詔令具析俄召良臣赴闕將柄用之淳熙四年召史浩於四明茂良覺眷衰因疾力求去上曰朕以經筵召史浩卿不須疑時曾覲欲以文資祿其孫茂良以格法繳進覲因茂良入堂道間俾直省官賈光祖等當道

不避銜司叱之曰參政能幾時茂良奏臣固不足道所
惜者朝廷大體上諭覲往謝茂良正色曰參知政事者
朝廷參知政事也覲慙退茂良批旨取賈光祖輩下臨
安府捷之手詔宜問施行太遽茂良待罪上使人宣諭
委曲令繳進乎詔且謂卿去雖得美名置朕何地茂良
卽奉詔茂良見覲勢益橫力求去上諭曰俟議恢復卿
當再來是日與郡令內殿奏事乃手疏恢復六事上曰
卿五年不說恢復何故今自及此還朝甚怒曰福建子
不可信如此良臣以宿怨從而傾之殿中侍御史謝廓
然覲黨也劾茂良落職尋論其矯旨竄降安置英州父

子卒貶所後復資政殿學士謚莊敏公良言恢復或謂
覲令人誅以再留茂良信之茂良沒朱熹得副本讀之
極言不可輕舉猶平生素論也深爲歎息云

論曰蕭燧忠實敢言全護善類李彥穎裁濫恩冗費不
爲近倖撓黃洽論治以用人爲急孜孜許國無以家爲
施師黠范成大抗禮虜庭使宋重於九鼎夫呂竝淳熙
良執政也龔茂良磊落大節殆無與讓然主眷旣衰又
爲羣小肆侮陳忠不已宜及於禍蓋說難自古所嘆云